

光緒撫寧縣志

撫甯縣志卷十二

名宦

蟹匡蠶績柴高興成邑之謠保障繭絲尹鐸布晉陽
之政召伯棠陰思留去後朱公桐邑祠祝生前自來
名宦之傳昭昭史冊矣撫甯自女真立縣以來厯有
官師豈無政教或戢暴鋤奸如龐參之拔薤或風流
儒雅如潘岳之栽花或訟清而雀鼠潛消或德洽而
鷓臬盡化廣文官冷鄭虔不愧經師縣佐職卑梅福
猶稱仙尉猥以金元代遠遂令文獻無徵故卽舊編
所載聊增益以當竹帛之垂此其前事可師尙取法

以作著龜之奉志名宦

明

婁大方浙江奉化人儒士洪武七年知縣事強幹果毅時值草昧因舊鼎新多所建置寇至率吏民避於兔耳山南僑立縣治經營區畫屹然有法吏民德之祀名宦

姜鎬河南修武人舉人成化十九年知縣事廉明勤敏修建文廟置祭器築社壇建譙樓招流亡士興絃誦民樂耕桑有去思碑樹儀門外祀名宦

葉宗蔭浙江遂昌人廣西儀衛籍舉人嘉靖間知縣事資性明敏興利除害一境肅然致仕去士民攀送涕泣如

失怙恃

雷應時山西芮城人舉人萬曆十一年知縣事律身清正
泣事明決課民紡織朔望驗其勤惰捐俸修縣志莅政
九載有古循吏風士民保留加通判銜祀名宦

王臺字古柏山東臨清人舉人萬曆四十三年知縣事敦
政甯人籌邊足用捐俸創建雲從書院課士校文文風
丕振有生祠在城隍廟側

余爵字天有河南禹州人進士崇正四年知縣事長才臥
理百姓安堵釐奸剔弊吏胥畏服歷兵部職方司監軍
征寇殉難贈太僕寺少卿謚忠壯

孫廷銓山東益都人進士沈靜寡言吏胥不能窺其涯淡
待士民恩禮兼至歷官吏部尙書內院大學士

吳宜山東濱州人歲貢嘉靖二十六年自遷安訓導陞任
撫甯教諭言坊行表士子矜式捐俸置學田三十畝以
賑貧生有碑記之祀名宦

杜浚字騰江直隸定興人崇禎十一年由明經任本學教
諭績學有素萬曆己酉七篇中式己擬本房上卷因後
場譏刺時事遂被黜讀其闈卷者咸爲之扼腕初坐臬
比卽申飭條約以端士習爲務時年近七十講學竟日
忘倦性尤剛鯁不事干謁有爲詞訟到學理詰求勝而

魄暮夜之金者揮之不受庠弟子有恚邑令者令銜之
走吏索款一日凡數次而滋不應竟以直道不容於時
罷去

國朝

侯一匡山西人生員順治元年知縣事質直有吏材時當
鼎革爲吏者多桀驁凌人公接士以禮恂恂雅飭有儒
者風會流寇過境人心惶懼公素悉賊淫掠狀咸令婦
女避之署中關城賴以保全適我 大兵入關紳衿耆
老遮道保留 命賜冠帶公由此益自奮勵嚴守禦
撫彫殘減役均徭刑清政簡惜以樸直忤當事卒於官

張毓中字泊水號去偏山西陽城人明崇禎己卯舉人順治元年十一月捧檄來蒞茲土撫邑爲東西孔道旌旄絡繹羽檄旁午守土者支應爲艱值鼎革之初亡者未葬流者未歸瘡痍者未起市兒探丸以肆惡吏胥舞文以亂法事多掣肘不啻衣敗絮行荆棘中公下車延訪耆老洞悉明季差繁賦重之弊一人逋累及一戶一戶逋累及一甲一人之人逃地荒而額稅雜需有加無已里季曰鶉衣囊木以充役歲卒更派如捕逃兵事竣而資橐俱盡甚則賣產鬻兒以代償公乃白諸當道力請蠲貲至於挽輸夫役閭閻巨朋應吏胥緣而爲奸公悉除之

事有不可已者爲之計有無均道里正用外一無所濫
而十七里始知有生之樂一切狐冠虎翼爲鬼爲蜮之
輩有犯必誅習俗爲之不變初邑承凋敝之餘人文寥
落士子博一第如登天相沿視誦讀爲迂途而爭營末
計公視事浹旬卽校試諸生擇可鞭策者立社以課之
多士爭相磨厲甫七月而聲譽大起政蹟舉畿東第一
擢刑部以去

譚琳湖廣宗陽人舉人順治十年知縣事下車卽以興文
教爲先甄別生童集文理優長者會課書院一切經費
俱捐廉俸又建魁閣於紫荊山邑人田化民女許字李

得金之子因壻貧悔婚訴於官公爲懲化民給花燭銀
命女與李子成婚養濟院口糧奉文裁減捐俸照舊發
給未幾擢戶部去

劉馨湖廣沔陽州人廕生順治十四年知縣事溫厚和平
御下以寬而民不能欺捐貲協建武廟設小學延塾師
重修雲從書院月三次課生童寒暑不輟縣志自明萬
曆十九年修散佚者多公爲諮詢補續歷任四載百廢
俱舉民受安靜之福撫臺獎云政簡刑清不愧民牧
趙端字又呂號立山浙江錢塘人貢生康熙十九年知縣
事性和而介與人藹如而不可干以私校士勸農以興

利除害爲任修書院課生童供給不足每賃衣以佐學
使吳公校士永平獨稱撫甯文風爲一郡最公之力也
公捐貲創建奎星閣於文廟東南隅復買宅建小學於
書院西建東塾於下莊南塾於張各莊西塾於所各莊
北塾於石河莊各擇諸生之文行素優者司之歲給束
修十二金炊爨之費無缺士風遂彬彬日盛朔望集耆
老講鄉約諄諄勸誡聽者興起邑旣衝瘠農商流散其
猾者多投充射利權子母以蠶食平民狐虎鴟張上下
莫敢誰何公廉得其惡悉寘之法尤桀驁者卽上其事
於部民始知有三尺法又念兵燹後遊手者衆蹴踘六

博之習日熾局設傾儲禍延比屋公嚴懲必行請託屏迹於是偷惰者相戒歸田乃招流亡勸開墾務農重本樹果木爲恆產勸紳士捐穀石廣積儲以備凶年編審素多積弊公矢詣神編審於城隍廟陋規盡革老死者去丁壯者補不闕不溢且豫示日期朝至夕返人無裹糧之苦又買地置義塚於橫山舖北正庫吏倉委之罪俾挪移出納之弊無所施革差役三十六凡戶婚田產之訟有不可已者諉鄉三老議俾健訟者革心官不置阜隸民不識縣門蓋前此所無也諸如修城池葺倉庫解署皆躬親綜理民不知役壬戌 乘輿東巡一切

帳殿行庖御橋輦路之工夙夜經營上不悞而下不因
民允隱受其福焉

程大僖字岵懷福建莆田人伊川先生二十四代孫監生

雍正四年知縣事懲惡安良興利除弊接紳士以謙而
不可干以私待胥役以慈而不敢玩其法先是地畝銀

花戶交給催頭每畝得東錢六七百或八九百

東錢以
一十六

文爲公每戶給發易知單將正耗開明每畝用銀六分

合大錢六十按限自封投櫃每歲所省不下萬金詳請

勒石以垂久遠蒞任甫一載竟以奏銷遲延呈吏議去

士民至今思之

裘君弢字約斯號退庵江西新建人進士雍正五年知縣
事性瀟灑不羈蒞任五載廉潔自持守前令程公遺規
絲毫不以累民致仕家居四壁蕭然

錢蓋字檢亭江蘇常熟人舉人乾隆九年知縣事下車以
課士爲首務時值洋河東徙亟謀捍築越二年河再東
徙力請上官委員勘護沿隄栽柳縣城恃以無患并修
建明倫堂捐置驪城書院膏火田至今賴之

陳鍾琛廣西臨桂人舉人乾隆三十二年知縣事本文章
爲吏治措置裕如縣試必自定甲乙人服其公勸武科
起家者新武成王廟與文廟並重他務亦次第修舉後

陞河南南汝光道

白萬程山東商河人舉人乾隆五十年知縣事嚴盜安良
閭閻不擾以紫荆山魁閣就圯文運不振令近村民立
燈竿於閣之舊基丙午戊申兩科登賢書者十人公題
先後騰輝匾於文昌正廳以紀其事

葛長信福建侯官人舉人乾隆五十七年知縣事浚官十
二載與民相習公事以柔道行之植川楚軍興兵差絡
繹又蝗蝻數起履畝驅捕禾稼不大害書院絃誦寂然
延闈孝廉趙承烈主講士風以振

李德字吉人陝西華陰人進士道光三年任整躬率物執

法不撓嚴絕苞苴剔除衙蠹邑有巨姦滑匪密偵姓名
急捕之盜無匿迹一境肅然重修雲從書院頒立規條
增置膏火提獎後學孜孜不倦士類咸有成就歲乙酉
飛蝗入境設法驅捕請開海禁轉遼東粟以濟民食至
今賴之後公以報最受知於

朝由牧令洊升節鉞清忠亮節所至有聲咸豐初年公巡
撫山東督師出境是時各路統兵距賊營數百里而公
獨捲甲深入直逼賊營與當事議不合爲其中傷以憂
憤卒時論惜之

字怡山滿洲正黃旗人江甯駐防進士道光九年知

縣事坦懷率直案無留牘以公事至鄉必減驕從自乘
一騎署中奴隸皆用衰老者乙丑逢

東巡大差供億繁瑣而能預辦卒以京控案致累嘗題堂聯
云願皆爲良善民無干國法誓不作貪酷吏有負生平
蓋紀實也陞灤州知州

李宗城字寶之江蘇吳縣人舉人道光二十五年署縣事
性英敏有吏才攝篆一年積案咸理與諸生論文一本
先民程式復捐俸以獎其優者先是口外民俗素悍公
馭之以道靡不帖息羣頌曰風肅關陞

許夢蘭字雲浦河南魯山人進士道光十八年征兵過境

羽檄紛馳因公勤政恤民才多幹濟由柏鄉對調來此料理兵差措置裕如不侮兵不擾民車騎傳餐泛應曲當且折獄片言案無留牘胥吏不敢售其欺尤加意文教書院一月三課親閱其文凡不利場屋者輒加改正偶出擬作卓然先正名程十九年交卸回任士民祖帳攀轅追隨十數里而不忍舍二十二年復蒞斯邑時值沿海設防屯兵守禦賴公鎮撫兵民相安又倡捐修葺城垣於海疆要害處築礮臺兵房火藥局並飭東西河南莊沿岸植樹萬株以爲保障民心感戴建立生祠迄今三十餘年長林蒼鬱民獲其利愛之如召棠萊柏云

敖星煌字乾垣江西萍鄉人進士咸豐元年知縣事性平易近人胥無城府酌減徭役以省苛繁實行保甲以清盜賊至胥吏之作奸民情之隱隱尤能坐照如神民不敢巧爲嘗試解任之日士民數百人赴府乞留因格於例不果

滕開勳字紹周安徽婺源人咸豐元年任邑之典史性情爽直守正不阿公暇移花種竹詩酒自娛門無雜賓時當地方不靖與同城官紳勸辦團練挨戶支更徹夜巡查地方賴以安謐同治元年海防吃緊孫邑侯勸捐修城委開勳分段監修昕夕忘倦踰二年竟因事撤任宦

囊如洗亦下僚中之不易覩者臨行賦詩留別邑人至
今尙傳誦之

撫甯縣志卷十三

鄉型上

來事堪師芳流百世匹夫爲善化服一鄉故鄉號鄭
公黃巾亦爲避境堂圖魏野紫禁會以傳觀某邱某
水訪釣遊之地皆知有道先生一事一言徵文字之
緣蚤企此邦曩哲第欲發潛而闡幽尤當循名以責
實悵前徽之俱杳从切瞻韓殷後學之抗希何緣御
李爰稽月旦遙沂風流凡屬緇衣向慕共覩先型下
如白屋賢豪皆登列傳志鄉型

明

王春字景暘號復庵宏治丙辰登進士丁巳改翰林檢討

爲壽王講讀官未幾王出封壽邸授右長史王幼居京

師春日以經書參侍講幄每對王云孝事太皇太后尊

敬皇上恪守祖宗法度爲王第一要務他如讀書循禮

好賢慈下不可不加意焉王禮重之轉左長史加正四

品服俸戊午隨王之國保甯途中軍衛有以賄賂誘王

之左右者春嚴禁之庚申改周府左長史王始十歲春

朝夕啟迪養之以善禁飭左右勿以淫巧惑王志王將

婚汴中巨室某賄通內豎謀爲元配春發其奸選良家

哀姓女爲王妃生郡王郡主二十餘人府之郡王凡六

十人將軍幾四千人皆教之以禮繩之以法辛酉汴大水屢決隄防或勸以土填門避之他縣春日王國上有宗廟下有宮闈城中官民方在驚疑王可先去以爲民望乎王遂止水亦不爲災城中賴以甯戢封邱郡府庶子應襲封其兄有花生者以千金賄求保勘春正色拒之庶子遂得襲爵王府莊田有侵奪民田者盡法清理有司軍民咸愛戴之母疾親侍湯藥焚香告天願以身代居喪哀毀逾禮府中宗室官寮啟王具奏奪情春固辭回籍經營喪事廬墓側歲餘服闋復任隨事匡救裨益良多解組後詩酒自娛嘗與友人李崆峒爲濮王賦

詩曰萬世綱常萬世承何須假借立殊稱漢家典故今
雖在宋室嫌疑孰與興服降朞年情未古名隆兩考理
非恆紛紛論別人休罷畢竟尊崇亦舊仍有復庵集行
世嘉靖十五年卒上遣官論祭命有司營葬祀鄉賢

魯鐸字文振宏治壬戌進士授岳州司李剛正質樸不畏
彊禦未幾行取大理評事執法無私每訊大獄多所平
反會逆瑾擅權有其黨繫獄瑾使所親略以事解遷官
鐸竟抵之罪忤瑾謀中傷乃以他事謫河內縣丞瑾敗
起沂水縣令廉明愷悌吏畏民懷陞刑部主事轉員外
郎中沉滯刑曹十餘年同列見俸深有勸其求遷者輒

拂衣麾去以是見重臺部適遼海警至科道交章薦奉
命按遼清理糧餉簡閱軍實革積弊嚴舉劾條奏皆有
成法事竣還朝遼人如失父母擢山東按察司僉事駐
劄登州登俗獷戾剽悍世族凌駕寒門鐸裁之以法教
之以禮三年令行禁止風俗一變撫按廉其賢能欲奏
績爲第一以老疾力辭士民攀轅而送者數百里不絕
所著有過庭文集卒祀鄉賢

翟鵬字扶九號聯峯正德戊辰進士授戶部主事抽分河
西務先至者往往以墨敗僚服咸惜其行鵬至首革常
例上不損國賦下不拂商心臺部重之轉爲員外郎出

守衛輝府歷四年撫按以賢能薦者二十五疏舉卓異者三及入覲銓部考天下第一時撫河南者疏請改守開封按四川者疏保改守成都上竟從開封請鵬至開封遂有併包之謠撫按交薦前後十餘疏咸謂經濟之才遷陝臬兵備洮岷轉按察司尋僉都察院巡撫甯夏有籌邊錄行於時會總兵誣排賴清議東還至嘉靖二十年寇犯山西邊鎮失利守臣連疏告急兵部尙書張瓚及府部會推鵬以原職督北直山東河南等處軍務鵬至寇平復命還京陞兵部右侍郎兼右僉都御史總督宣大偏保等處軍務疏請兵糧以禦寇不報尋謝事

歸無何寇果深入復起鵬照前總督斬獲甚衆捷聞晉
秩兵部尙書兼都察院左副都御史總督軍務如故後
以忌者中傷被逮卒於京鵬性慷慨有氣節多謀畧故
所至成功他如挫逆瑾之黨卻白爵之金修已廢之邊
擒巨寇之首奇猷碩畫見於名臣奏疏因過直不能俯
仰權門遂不終其位有詩云惟有寸丹懸帝闕更無尺
素達權門可以知所養矣隆慶初追論前功始復原官
加卹典賜祭葬如禮祀鄉賢

附明史列傳

翟鵬字志南撫甯衛人正德三年進士除戶部主事歷

員外郎中出爲衛輝知府調開封擢陝西副使進按察使性剛介惡官以清操聞嘉靖七年擢右僉都御史巡撫甯夏時邊政久弛壯卒率占工匠私役中官家守邊者並羸老不任兵又番休無期甚者夫守墩妻坐舖鵬至盡清占役使得迭更野雞臺二十餘墩孤懸塞外人棄不守鵬盡復之歲大禋請於朝以振坐寇人停俸復坐劾總兵官趙瑛失事爲所訐奪職歸二十年八月俺答入山西內地兵部請遣大臣督軍儲因薦鵬乃起故官整飭畿輔山西河南軍務兼督餉鵬馳至俺答已飽去而吉囊軍復寇汾石諸州鵬往來馳驅不能有所撻

寇退乃召還明年三月宣大總督樊繼祖罷除鵬兵部
右侍郎代之上疏言將吏遇被掠人牧近塞宜多方招
徠殺降邀功者宜罪寇入官軍遇敵雖無功竟賴以安
者當錄若賊衆我寡奮身戰雖有傷折未至殘生民者
罪當原於法存誠論功損挫論罪乃有摧鋒陷陣不暇
斬首而在後掩取者反積級受功有遠巡觀望幸苟全
而力戰當先者反以損軍治罪非戎律之平帝皆從其
議會有降人言寇且大入鵬連乞兵餉帝怒令革職閒
住因罷總督官不設鵬受事僅百日而去其年七月俺
答復大入山西殺掠太原潞安兵部復請設總督乃起

鵬故官令兼督山東河南軍務巡撫以下並聽節制鵬
受命寇已出塞卽馳赴朔州請調陝西薊遼客兵八支
及宣大三關主兵兼募土著選驍銳者十萬統以良將
列四營分布塞上每營當一面寇入境游兵挑之誘其
追諸營夾攻脫不可禦急趨關南依牆守邀擊其困歸
帝從之鵬乃浚濠築垣修邊牆三百九十餘里增新墩
二百九十二護墩堡一十四建營舍一千五百間得地
萬四千九百餘頃募軍千五百人人給五十畝省倉儲
無算疏請東自平刑西至偏關盡地分守增游兵三支
分駐雁門甯武偏關寇攻牆戍兵拒游兵出關夾攻此

守中有駁東大同西老營堡因地設伏伺寇所向又於
宣大三關關各設勁兵而別選戰士六千分兩營遇警
令總督武臣張鳳隨機策應此戰中有守帝從其議且
令自今遇敵逗遛者都指揮以下卽斬總兵官以下先
取死罪狀奏請先是騰遣千戶火力赤率兵三百哨至
豐州灘不見寇復選精銳百遠至豐州西北遇牧馬者
百餘人擊斬二十三級奪其馬還未入塞寇大至官軍
饑億盡棄所獲奔騰具實陳狀帝以將士敢深入仍行
遷賞舊例兵皆團操鎮城聞警出戰自邊患熾每夏秋
間分駐邊堡謂之暗伏騎請入秋悉令赴塞晝地分守

謂之擺邊九月中還鎮遂著爲令二十三年正月帝以去歲無寇爲將帥力降勅獎鵬賜以襲衣至三月俺答寇宣府龍門所總兵官卻永等却之斬五十一級論功進兵部尙書帝倚鵬殄寇錫命屢加所請多從而責效甚急鵬亦竭智力然不能呼吸應變御史曹邦輔嘗劾鵬鵬乞罷弗允是年九月薊州巡撫朱方請撤諸路防秋兵兵部尙書毛伯温因併撤宣大三關客兵俺答遂以十月初寇膳房堡爲卻永所拒乃於萬全右衛毀牆入由順聖川至蔚州犯浮屠峪直抵完縣京師戒嚴帝大怒屢下詔責鵬鵬在朔州聞警夜半至馬邑調兵食

復趙渾源遣諸將還敵御史楊本深劾鵬逗遛致賊震
畿輔兵科戴夢桂繼之遂遣官械鵬而以兵部左侍郎
張漢代鵬至下詔獄坐永戍行至河西務爲民家所窘
告鈔關主事杖之厥衛以聞復逮至京卒於獄人皆惜
之初鵬在衛輝將入覲行李蕭然通判王江懷金遺之
鵬曰豈我素履未孚於人耶江慙而退其介如此隆慶
初復官

王道中字致甫號黃齋春子正德甲戌進士授安慶府推
官太湖險遠人多避差有一人至縣卽令賂納傾家蕩
產民甚苦之道中至親詣其所婉曲曉諭止令自納民

皆稱便揚州府知府孫某爲御史張士隆劾奏贓私鉅
萬朝廷差給事中王俊民同清軍御史陳傑會勘久之
未決道中一勘卽明科道敬服連章薦舉時宸濠之變
餘黨未盡緝奸細者往往濫及平民道中查有賊仗旗
幟止坐四人餘三百餘人盡釋之人稱神明陞刑部主
事嘉靖癸未轉員外郎甲辰陞鴻臚寺右卿轉左卿十
二年凡侍經筵小心如一乙未改大理寺右卿己亥陞
順天府尹辛亥卒著有黃齋集藏於家

王印

以廟諱改

祥字邦瑞號槐亭隆慶辛未進士初授河南

偃師縣知縣吏治澄清恩威並著縣前有苦水井化爲

甘泉時屢荒下車後時和年豐人咸謂善政之感行取
刑科給事中丰裁峭厲遇事敢言條陳九邊要務上嘉
納之因劾江陵奪情外轉河南僉事鋤强扶弱執法無
私進四川提學參議禁淫俗正士風搜遺中解人咸服
其藻鑑遷陝西按察司副使適西番告警祥至覈軍實
嚴守備剔弊奸內外肅然當事特薦者二十餘疏以親
老力辭祥生平不喜干謁邑大夫非公事經年不面性
孝友樂施予晚年博覽經史纂述左傳諸書閉戶卻闌
宦之餽捐金建文峯之塔優游林下十餘年人皆高之
王調元字燮甫萬厯戊午舉人初署河南嵩縣教諭陞山

東臨胸縣知縣調滕縣歷任多善政丁丑解組歸閉戶
訓飭子孫不事干謁鄰里址畔有爭者輒讓之周貧濟
乏時遭橫逆亦不校鄉里服其德量焉

附宋琬王和陽先生傳

王公諱調元字變甫號和陽其先晉人也明洪武初始
祖孝通遷撫甯之深河里七世皆力田公父蓋唐公始
爲儒折節讀書爲諸生有聲公生甫期而蓋唐公卒母
王孺人撫之食貧措拄無間風雨寒暑歲時伏臘抱兒
以見於廟且泣且祝曰未亡人所不卽從地下者以菹
諸孤在也顧安得見其任衣冠以一盂麥飯燒爾父冢

上草乎公爲兒時卽嶄然露頭角旣稍長痛其早孤自傷不比于人於是博極羣書所學大就十七補博士弟子員學使者奇愛之使食餼焉嘗讀書維摩方丈中丙夜呬唔雜鐘魚梵唄間朝蘊暮鹽二十年如一曰萬厯戊午舉順天鄉薦謁臺使劉公涕泣再拜臚王孺人守節撫孤狀以請劉公爲之惻然疏上報可敕有司旌表如儀烏頭楔棹大書于閭曰故茂才王堯相妻王氏貞節之門鄰里嗟嘆有泣者皆曰王氏有子矣辛未以母老乞署教職乃除嵩縣學諭倣胡安定教士法與諸生相切劘嵩人始知師弟子之禮勢家奴有辱諸生于市

者公曰士如此我可去矣勢家聞之惶恐謝不謹乃已
其不畏強禦如此甲戌陞山東臨朐知縣太孺人就養
於官退食必告曰今日聽斷幾何事大人以爲何如太
孺人稱善乃敢就舍齊俗夸而好訟猶有六博蹋鞠鬪
雞走狗之遺風公一切以寬平簡易治之吏不敢欺民
用大悅時流寇犯河南所過郡邑多破朝廷用言者議
以修城垣練鄉勇儲倉廩備器械爲守令殿最朐城故
版築地高無水廬閤鱗次附女牆而居者千餘家令下
之曰公曰城堅不須築也青州道朱公之齋嚴檄切責
公曰賊遠在二千里外而使吾民婦子露處是人心先

自解也雖有金湯之固吾誰與守朱公不得已單騎來
視高墉屹屹睥睨相望而守禦之具纖悉畢備乃嘆曰
公言是也御史張公盛美滕人也上疏曰臣邑雖小而
當河南之衝賊渡黃河而比暮可至城下也誠欲爲疆
土計臣愚以爲宜選良吏有文武才者勅撫按推擇更
調以聞便於是當事以公應詔調知滕縣先是妖賊徐
鴻儒之亂滕人死者無算又其地鄰曹濮其人輕剽悍
疾多椎埋探丸之盜奸吏舞文與巨猾相表裏爲民害
公曰是不可以臨胸治也令嚴法必有犯必誅於是奸
盜屏息境內肅然蒞滕甫兩月勾稽公帑厰驛及積逋

之在民者六萬兩太守王公國賓曰公此舉良快顧吾
方有水衡大農急逋姑借用而徐償公可乎公有難色
太守業銜之會鄒嶧兩令缺乃以公請攝篆將以困之
也公言之撫軍曰滕亂絲也蚤夜爬梳懼猶不理今舍
而之旁邑譬猶家有積薪而兩鄰失火主人自往救之
火未息而室先焚矣夫一邑令何足惜如疲邑之民何
撫軍韙之戒公勿往而檄太守再擇署者於是太守積
不平曰此鞅鞅者難爲下也居亡何以懇直論劾罷歸
公歸二年而山東數被兵州縣破者十六七公率其四
子及內外孫若而人筵講鞠臚爲太孺人壽日某以六

尺孤賴大人恩勤拊育至於今抱孫矣迺得乞骸骨歸
田里非大人之賜不及此太孺人喜爲舉一觴已而以
病卒公哀毀逾制充充如不欲生喪葬畢語所親曰使
吾不以得罪上官斥安能視慈母之含禭乎迺知忌者
之言適所以成吾志也公家食三十年足未嘗一履公
庭邑宰到門多以病辭故人在選部者數以書招之且
屬臺使者起之公笑而謝之曰乃欲以我爲嵇中散耶
孝廉張君啓源與公爲一人之交以其季女爲公子運
恒婦旣委禽矣而張君早世庚午灤州城陷女在兵間
公贖以金帛而爲運恒娶焉或以爲言公曰吾豈以死

生患難負我良友哉季子邁明妻詹氏父世烈判禹州而客死公爲歸其旅櫬而養其寡妻誠季子以母事之凡此皆人所難能者而公顧毅然爲之雖前史所載范巨卿之與張劭何以加焉甲辰五月寢疾彌留諸子侍側第以孝謹敦睦勿忘祖考之艱難爲言卒之日親黨咸弔莫不流涕嘆息而去公生于萬厯庚辰月日卒于康熙甲辰月日盲年八十有五少宰石公申儀部郎余公一元嘗表誌其墓矣以故子孫世系多不載爲著其大者如此

宋琬曰余家青齊之間驅車而過駢邑之墟其父老多

言王公之爲宰誠長者也後余持節右北平嘗一再造
其廬王公輒謝不見然知其爲篤行君子也及聞張孝
廉之事不以生死盛衰易心何其深於義耶夫燕趙古
多悲歌慷慨之士而不少概見何哉若王公者斯無愧
焉嗚呼徒循吏也哉

李蘊粹字詒完讀書好古痛惡擄捕鄉人化之由恩貢授
東昌府通判修築河堤工竣省銀萬餘兩繳部陞陝西
乾州知州

徐應登字子科號進吾敦行孝弟不昧孤姪遺金鄉黨推
重以明經授真定廣文教人先德行而後文藝不計束

脩之有無公暑敝壞出家資修理之羣弟子景仰其高
翟凌雲字崑瀛由恩拔授山東肥城縣令不畏權勢除巨
奸大蠹擢兗州同知濟河有功省帑銀四十萬爲共事
者所忌罷歸林下三十餘年閉戶養重稱鄉望焉

蕭奇棟字肇元由恩拔筮仕山西蒲城縣知縣時流寇猖
獗騷擾地方蒲邑凋殘民不聊生公至拊循多方戰守
有具百姓恃以安輯尋陞南陽府同知卒於官

溫克敏字明宇循循雅飭行孚於鄉足爲後學矜式由恩
選授湖廣漢陽府同知卒於官

王之葵由貢生任江南徐州河糧廳智明膽決不肯阿徇

當流寇之亂州牧自焚公亦堅求自盡士民力救得免
以徐水陸要衝南北限界難治易亂各憲司勉以代篆
公視事三載撫恤瘡痍流民復業一時稱之

王德育字養吾由明經任蘇州訓導介潔質樸教誨有術
起衰振靡楷模多士上臺獎云賢良方正不愧司鐸

陳友諒汝陽人父召二洪武元年以軍丁從華雲龍克永
平十三年燕藩建隸燕山右衛中所百戶劉成二十二
年卒友諒補軍建文元年秋七月癸酉靖難兵起從征
懷來八月耿炳文率師北伐前鋒抵雄壬子王渡白溝
河夜半圍雄拔其城屠之友諒大戰有功授小旗九月

戊辰吳高以遼東兵圍永平友諒從王往援十月壬寅
襲取大甯城時李景隆引軍薄北平築壘九門十一月
辛未友諒從王戰於鄭村壩進攻東直門壘授總旗十
二月從王征大同庚申次廣昌二年春正月丙寅次蔚
州皆下其城二月癸丑至大同四月景隆與郭英吳傑
平安進兵白溝河友諒從王大戰景隆敗走濟南五月
癸酉追至德州入其城庚辰攻濟南敗景隆軍於城下
圍久不克八月戊申解還友諒陞本衛百戶三年三月
辛巳與盛庸戰於夾河四月戊戌遇吳傑平安軍於藁
城七月房昭屯易州西水寨友諒從王鏖戰圍之四年

正月克東昌東平東阿汝上等處四月奪小河橋甲戌
大戰齊眉山下二十七日攻何福軍於靈璧縣明日破
其營五月己丑下泗州六月乙卯自瓜州渡江乙丑克
應天府友諒以功陞孝陵衛中所正千戶永樂八年二
月帝北征友諒從五月己卯追木雅失里於幹灘河丙
寅還次臚胸河六月甲辰阿魯臺僞降率千騎薄中堅
友諒從帝衝其陣七月丁卯次開平八月回衛十二年
四月從征至興和六月戊申擊敗馬哈木回衛宣德二
年七月調撫甯衛左所正千戶遂家焉正統八年十二
月請老子孫襲職至明亡

王進縣之萬家莊社人
洪武三十三年即建文二年隨靖難兵

攻克滄州十二月東昌大戰三十四年建文三年夾河大戰

又三月藁城大戰全勝三十五年建文四年淝河大戰勝四

月小河汴河堤靈壁縣大戰全勝攻破營圈陞本所副

千戶五月至泗州過淮河至盱眙揚州六月至鎮江皆

下其城十三日平定京師十一月十四日陞武德將軍

營州左護衛左所正千戶永樂二年十二月二十一日

予世襲十七年卒八月二十五日子貴襲正統九年征

富峪川斬賊首一顆四月十七日陞明威將軍忠義左

衛指揮僉事成化三年卒子璽襲傳爵至明亡

陳斌山後錦川州感化里人父敬文能騎射多材略洪武

三年歸附隸戎籍撥通州衛前所老退斌代役二十三年征沙都山至甯夏二十五年撥燕山右護衛中所二十年征臚胸河黑松林建文元年七月靖難兵起從取居庸懷來八月克雄縣鄭州攻圍真定九月接應永平攻克大甯十一月鄭村壩大戰全勝陞總旗十二月克廣昌明年正月取蔚州攻圍大同四月白溝河大戰全勝五月圍濟南九月實授百戶十月攻克滄州十二月東昌大戰又明年在威縣深州敗真定截路軍馬三月夾河大戰全勝閏三月藁城全勝就征順德十月攻

克西水寨十一月陞本衛指揮僉事四年正月克東阿
汶上沛縣三月泥河大戰全勝六月渡江十三日克金
川門十二月陞懷遠將軍燕山左護衛世襲指揮同知
永樂八年從征迤北五月追木雅失里於元溟河六月
敗阿魯臺於靜虜鎮有功八月陞本衛指揮使十二年
三月從征迤北至古林敗敵洪熙元年正月調撫甯衛
指揮使因家焉宣德四年請老子孫襲職至明亡

王楨其先江南安慶府望江縣人父勝授承信校尉福州
右衛所管軍百戶洪武十四年八月告老疾楨襲十一
日調淮安衛十七年十二月調薪貴守禦所百戶二十

七年五月予副千戶陞鳳陽中衛所副千戶二十九年
調防邊五月巡北口陞地方巡哨八月征進五閔三十
年征進大浪等洞獲一功五月回衛永樂三年二月調
遼東東甯衛中所副千戶九月調撫甯左所副千戶遂
家焉十六年正月告老疾子孫襲職至明亡

蕭陞本衛指揮僉事舉將材陞馬蘭峪參將嘉靖癸巳大
同內變結連外寇兵部會推以副將協守大同等處公
至兵事戒嚴內外不通乃詣軍門獻搗巢計賊遂瓦解
尋進前軍都督府都督僉事欽差鎮守三屯等處總兵
官十九年卒詔賜卹典葬祭

周徹本衛指揮同知建之子舉將材累陞保定副總兵嘉
靖二十三年寇犯浮圖峪鋒銳甚京師震動公夜發兵
七千遇賊蜚狐嶺自辰戰至申箭中賊首少却乘勝擊
之凡四日而賊北捷聞賜璽書獎勞特陞右軍都督府
同知欽差鎮守三屯等處總兵官三十一年兵部會推
用參神機營事因監造不如法謫戍卒

劉思本衛指揮同知舉將材陞龍門守備尋僉萬全欽依
山西行都掌印都司好義樂施鄉黨有不能婚葬者捐
貲助之嘉靖十七年歲荒勸富民出糧七百石賑活者
甚衆子涵本衛指揮同知舉將材陞遵化守備欽差神

機等營佐擊將軍

高維祺本衛指揮僉事舉將材陞薊州守備先是繕城勤勞懋著丁卯外寇擁眾剽掠公率眾捍禦調度得宜寇知有備乃引去子萬里本衛指揮僉事舉將材陞灰嶺口守備欽差游擊

國朝

郭永靜字上垣由拔貢授江西上饒知縣以守禦功陞紹興府同知蒞任多異政兵民安戢士民鑄石頌之服闋補邵武府同知

徐延榮字仁甫由恩貢考通判改授河南新鄉縣丞仍加

六品服俸居官一載固辭而歸杜門謝客不入城市

鄒勳字扶皇內貢生任蕭山知縣縣素稱難治無久任者
公以慈儉御之上憐其拙民樂其寬六載解組歸寒素
如諸生時

馮泰運字義軒任江南溧水縣知縣吏治精敏嘗捐貲二
百餘金助修撫甯學宮及制銅祭器二百四十二件以
光春秋祀典

馮隆運字明軒筮仕山東長山令慷慨豪爽治政明斷士
民欽服及還里篤友愛崇信義解人之紛濟人之急鄉
黨重之

蕭奇楹陞之孫臨清左營參將居官數載持身冰蘗林居
食貧無所干謁

溫如玉字尹亭號廉圃臺頭營人乾隆甲子科聯捷成進
士由翰林院檢討陝西道監察御史癸酉充廣西正考
官升禮科給事中轉刑科掌印給事中乙亥己卯提湖
南北學政甲申巡視山東漕務旋以病乞假歸父德厚
慷慨有大志薄遊淮上入貲爲郎繼娶於淮生二子次
如暄終國學生長卽尹亭也天性孝友髫齡就傅日誦
千言老生宿儒咸目爲奇器弱冠回籍應童子試冠其
軍迨木天翔步屢掌文衡所拔尤多卓犖之士歷官清

要廉潔自持

王春方隆因疾引退以永郡爲孤竹遺墟有廉讓風遂家焉
家藏書萬卷著有靜淵齋詩存

王瑞徵字莆田太和寨人幼沈默不輕言笑與人接肫肫
如也讀書能得問先輩吳蔭松山長歐陽紹洛亟稱賞
之家寒素自父濟困小試生計益窘堂叔潤輒助之嘉
慶癸酉甲戌聯捷成進士授刑部主事研究律例數月
後卽練達老吏不能欺蔣礪堂相國官西曹時嘗謂案
經王司員辨罪無枉縱二十四年總派秋審獄苟可疑
必出爲矜全出署江甯府案牘久不結者皆以次審定

之道光八年入爲浙江司員外郎十年遷江西司郎中
十一年發往江蘇以道府用召見

圓明園奏稱

昔有汝本無人保舉今到江南勉爲好官之

諭瑞徵感荷

國恩益以清勤自矢十二年署常州府篆時洪湖陡發高
郵堤工漫溢下流州縣俱爲巨浸常地處衝途災黎徧
野捐廉倡紳富設法留養全活甚衆三月補常鎮通海
道兼管河務關部在在緊要瑞徵勤求水利清釐樞政
嗣屢奉差委積勞成疾卒於官署旋有貴州臬司之

命至則歿已數日矣瑞徵慙奉

恩綸出差十一省久契

宸衷咸謂秉節封疆指日可待竟未拜臬司新命以歿制軍
陶公澍中丞林公則徐莫不惜之

王兆松字公卜道光戊子解元癸巳會魁由翰林庶吉士
改工部主事補屯田司掌硝磺庫丁外艱服闋後升員
外郎轉郎中監督黃木廠咸豐癸丑補山東道監察御
史轉貴州道巡視南城升兵科給事中稽察通州西倉
轉戶科掌印給事中補鴻臚寺少卿以母喪歸奉

督辦團練丙寅卒於家年六十五父國興字應宸邑庠生

伉爽質實治家斬斬有法教子尤嚴公生而岐嶷孝友
誠慤沈默寡言爲文議論閎博寢饋大家服官清要內
介外和同僚咸仰其丰采其掌確磧庫也山東委員解
磧到部書吏勒索規費公知之立卽斥革積弊以清掌
戶科給諫時聞通州一年內添設油漆舖百數處恐內
藏奸宄奏請搜訪後大沽有變悉如公言由是屢蒙

廷

召嚮用甚殷鴻臚供職遇壇廟大典無不恪恭將事逮諠

禮家居閉門謝客不預外事弟兆柏以壬戌進士遷河
間教授不赴任優游泉石書史自娛人比之江東二陸
云

張化民字雨時嘉慶戊寅舉人學優品端遊其門者春秋
兩闈多得氣飛去道光間選授柏鄉訓導清苦自勵時
蜀劉垣宰柏人捐重賞以擒巨盜能吏也沒後歸櫬無
力眷屬羈柏者八年化民以冷宦時加賜恤又愆恩後
任邀請紳商釀五百餘金送之歸旋調井陘適咸豐辛
亥髮賊薄城下化民誓以身殉給貲驅家屬出城已數
日矣值勝帥提兵過境城得全未幾柏鄉城破後任罹
俱焚之慘知遷調非偶然也嗣以老告歸卒年七十三
恩慶滋字春農道光己酉拔貢生成豐辛亥舉於鄉博學
工詩文書法尤秀整授徒十餘年後進無不推爲宗匠

考取內閣中書廉靜自持勤於公事補缺後由中書加四級時同年諸公內至軍機外至封疆率皆慕其文名重其品誼而賦性清介不喜干謁人亦不忍干以私官內閣數年親老告近以同知需次山西抵晉年餘已屆輪補竟被夤緣者斂去積憤成疾卒於省寓

馬壯圖字克臣渝關人道光己酉科武舉由兵部差官分發山西以營守備用同治二年到省三年派委石樓縣辛關防堵尋補澤州擡軍營中軍守備六年改補太原營中軍守備護理澤州營參將七年因防務出力記功二次委署朔州營都司八年護理太原營參將十月蒙

毅軍湖南提督宋札調隨營差委十月攻克洪崗等處
獨寨有功 賞戴花翎並加游擊銜鎮守綏遠城等處
光緒二年蒙一等恪靖伯左奏關隴肅清以游擊儘先
陞用題補甯武營都司壯圖器宇寬宏和平謙讓內而
孝友家庭外而和睦鄉里咸豐十年之變官民逃匿提
塘僅賸一人馳遞軍報昕夕勤勞復讓已之功掩人之
罪及防堵辛關軍律嚴明民心感戴同治七年髮逆張
總愚撲澤州戰守七晝夜賊退所獲輜重兵民均分已
秋毫無取地界河南兩處民送威震山河額並立德政
碑萬民衣繖嗣留京爲提督宋營辦理軍務積勞致疾

卒於京寓年五十一

以上仕蹟

補遺

劉鉞景泰癸酉舉人成化初知山西介休縣以廉明稱卒

於官

山西通志案撫甯同時有二劉鉞一係正統甲子舉人成化間與昌黎杜謙相繼為浙江承宣布政

司右布政使

見浙江通志

李震洪武九年歲貢生宣德初知湖廣沔陽州剛介不阿

善於撫字修飾學校後以老去民不忍舍

湖廣通志引明一統志案

震府縣舊志俱作宸